



Centar za zastupanje
građanskih interesa

Rasprava o Budžetu Kantona Sarajevo u 2011

- Održan okrugli stol nevladinih organizacija o nacrtu budžeta Kantona Sarajevo za 2011-tu godinu

- Ministar Kozadra dva sata razgovarao sa predstavnicima nevladinih organizacija

- Tehnički aspekt upravljanjem budžetom je jasan, ali programski nije

(SARAJEVO, 09.mart 2011) Danas je u Sarajevu, u organizaciji Fondacije CPI, održan okrugli stol nevladinih organizacija o nacrtu budžeta Kantona Sarajevo za 2011-tu godinu. Sa predstavnicima desetak udruženja, fondacija i koalicija razgovarali su Muhamed Kozadra, ministar finansija Kantona Sarajevo i njegova pomoćnica Zlata Prguda.

Budžet kantona Sarajevo za 2011-tu, u iznosu od 715 miliona KM, je rezultat mogućnosti i potreba, ali Vlada Kantona Sarajevo će u narednom periodu biti veoma stroga kod odobravanja zapošljavanja novih ljudi i regresiranju javnih kompanija koje godinama bilježe gubitke. Ministar Kozadra je pojasnio je da u oko 220 miliona KM koje se iz kantonalnog budžeta izdvajaju za plate više od 10.000 zaposlenih u kantonalnim institucijama, samo 720 ljudi radi u administraciji dok su ostatak policajci, profesori i nastavnici i drugi kadrovi.

Predstavnici nevladinog sektora su otvorili pitanje odgovornosti zaposlenih u kantonalnim institucijama i javnim preduzećima, rodne ili polne osjetljivosti budžeta, saradnje sa nevladinim sektorom i nepoštivanja Zakona o slobodi pristupa informacijama.

Kozadra je objasnio da će subvencionisanja i sanacije gubitaka javnih preduzeća u narednom periodu biti regulisana novim zakonskim rješenjem. Ministar je objasnio da Vlada mora prije svega izvršavati zakonske obaveze, ali i da bi [javni prihodi](#) bili znatno veći kada bi inspekcije radile svoj posao i kada bi bile naplaćene sve koncesije. Napomenuo je da kreditna sredstva (35 miliona MMF-a i 10 miliona domaćih banaka) sigurno neće otići u tekuću potrošnju.

I pored dobrog odziva i otvorenog dijaloga, nevladine organizacije nisu dobile objašnjenje zašto je finansiranje projekata nevladinog sektora nedovoljno transparentno i kada će kanton Sarajevo biti u prilici da sufinansira projekte civilnog društva.

Valentina Pelizzer iz organizacije One World: "Saznali smo dosta o tehničkim aspektima upravljanja budžetom ali nije se govorilo o programima. Vlade kontinuirano koriste budžetska ograničenja kao izgovor da ne bi provodile ono što su obećale i za što su dobile povjerenje građana na izborima. Zato ovu diskusiju treba nastaviti sa resornim ministrima

CPI je nevladina, neprofitna organizacija koja prikupljanjem, analizom i objavljivanjem podataka od interesa za građane, te njihovom promocijom, aktivno podržava izgradnju civilnog društva. Fondacija CPI nastoji omogućiti da javni i verificirani podaci važni za građane BiH budu lako dostupni u kontekstu i na način kojeg može razumjeti građanin koji se profesionalno ne bavi javnom administracijom i javnim finansijama.